

ՄԵՐ ՀՈԲԵԼՅԱՐՆԵՐԸ ՀԱՌԻ ՅՈԲԻԼՅԱՐԸ

ՀԱՅ ԱՐԵՎԵԼՅԱԳԻՏՈՒԹՅԱՆ ՆՎԻՇՅԱԼ, ԲԵՂՄՆԱՎՈՐ
ԳՐՉԻ ՏԵՐ ՏԱՐԱՆԴՎՈՐ ԳԻՏՆԱԿԱՆԸ
(Նիկոլայ Յովհաննիսյանի ծննդյան 90-ամյակի առթիվ)*

Պատոմագիտության դոկտոր, պրոֆեսոր, ՀՀ ԳԱԱ թղթակից անդամ,
գիտության վաստակավոր գործիչ Նիկոլայ Հովհաննեսի Հովհաննիս-
յանը բոլորեց իր կյանքի 90-ամյակը։ Տարի-
ների հեռավորությունից գնահատելով ակա-
նավոր արևելագետ-արարագետի անցած կյան-
քի երկարատև ուղին և գիտական վաստակը՝
անվարան կարելի է ասել, որ հայ պատմագի-
տության անվանի երախտավորն ու նվիրյալն
իր հաստատուն տեղն է զբաղեցնում մեր գի-
տական մտքի արժանավորների շարքում։ Ար-
դարև, նրա անցած կյանքի ճանապարհը հա-
րազատ ժողովրդին ու հոգևոր արժեքներին բո-
լորանվեր ծառայելու փայլուն և ուսանելի օրի-
նակ է։



1950-ական թվականներին, երբ երկարատև
դադարից հետո Հայաստանում վերստին գոյության իրավունք ստացավ
անցյալի հարուստ ավանդությներ ունեցող արևելագիտությունը՝ ի
դեմս գիտությունների ակադեմիայի կազմում ստեղծված արևելագի-
տության բաժնի, Ն. Հովհաննիսյանը դարձավ վերընձյուղված գիտա-
կան այդ կարևոր ուղղության վերածննդի անմիջական մասնակիցներից
մեկը։ Մարդ, ով կանգնած էր հայ նոր, ժամանակակից արևելագիտութ-
յան ակունքներում։ Հիրավի, Ն. Հովհաննիսյանը Հայաստանի ԳԱ արևե-
լագիտության սեկտորի (հետագայում՝ Արևելագիտության ինստիտուտի) հիմնադիրներից և հիմնասյուններից մեկն է։ Նա հայ արևելագետների
խանդավառ առաջին սերնդի փաղանդի հետ իր ուսերի վրա է կրել հայ
արևելագիտության ձևավորման ու զարգացման ողջ ծանրությունը։
Մասնավորապես, արևելագետի անվան հետ է կապված հայ արաբագի-
տական դպրոցի հիմնադրումն ու ձևավորումը Հայաստանում։ Սակայն
նաև անուրանալի է նրա անմիջական մասնակցությունը հայ արևելա-
գիտության մի շարք ուղղությունների ձևավորման ու զարգացման գոր-
ծում։

Որպես պրոֆեսիոնալ արաբագետ՝ Ն. Հովհաննիսյանն արևելագի-
տության այդ կարևոր ուղղությունը հարստացրել է ոչ միայն նոր ճյու-
ղավորումներով, այլև՝ սկզբունքորեն նոր հայեցակարգային և հիմնա-
րար տեսադրույթներով։ Առանց չափազանցության կարելի է արձանա-

* Ներկայացվել է 01. VI. 2020 թ., ընդունվել է տպագրության 10. VI. 2020 թ.։

գրել, որ նա հայկական արաբագիտական դպրոցի հիմնադիրն է: Անչափ մեծ է նաև նրա դերը Հայաստանում արաբագիտությունը սիրողական մակարդակից գիտական մակարդակի բարձրացնելու գործում:

Անխոնջ աշխատասիրությամբ աչքի ընկնող գիտնականը բեղմնավոր գրչի տեր է: Նրա գիտական արտադրանքը, նաև հրատարակած աշխատությունների թվաքանակը վերին աստիճանի տպագորիչ է: Դրանց մի զգալի մասը լույս են տեսել աշխարհի տարբեր երկրներում, տարբեր լեզուներով: Շնորհիվ նրա վաստակի, հայ արաբագիտությունը միջազգային ճանաչում ձեռք բերեց:

Զափազանց լայն և ընդգրկուն են պլոփ. Ն. Հովհաննիսյանի գիտական հետաքրքրությունների շրջանակները: Մասնավորապես, նրա հետաքրքրությունների տեսագաղտում գտնվող գլխավոր ուղղություններն են եղել հետևյալները. Արաբական Արևելքի երկրներում ազգային-ազատագրական շարժումներ, Արաբական Արևելքում միջազգային և տարածաշրջանային հարաբերություններ, արաբական երկրների պատմությանը նվիրված ուսումնասիրությանը նվիրված գործեր, Արցախի հիմնախնդիր, ուղմագարական անվտանգության հարցեր շոշափող հետազոտություններ, ուսումնական ձեռնարկների՝ դասագրքերի պատրաստում և այլն:

Ն. Հովհաննիսյանի ուսումնասիրություններում իր ուրույն տեղն է գրավում Էթնոքաղաքական կոնֆլիկտների՝ գլխավորապես Լեռնային Ղարաբաղի խնդիրների հետազոտությունը, որոնցում առաջ է քաշում նաև այդ խնդրի ինքնատիպ լուծման առաջարկներ: Նա արցախյան-դարաբաղյան հիմնախնդրի լուսաբանման վերաբերյալ մի շարք երկրներում հրատարակել է հինգ մենագրություն և բազմաթիվ հոդվածներ:

Հայոց ցեղասպանության հայեցակարգային հիմնախնդիրները մշտապես գտնվել են Ն. Հովհաննիսյանի գիտական հետաքրքրությունների կենտրոնում: Դրանց ուսումնասիրությանը նվիրել է հետազոտությունների մի ամբողջ շարք՝ շուրջ 20 մենագրություն և 100-ից ավելի գիտական հոդվածներ, որոնք լույս են տեսել տարբեր երկրներում:

Առանձին հետաքրքրություն են ներկայացնում վաստակաշատ գիտնականի աշխատությունները՝ նվիրված արաբական գաղափարախոսության ուսումնասիրությանն արաբների անկախության նվաճման և ինքնիշխան պետություններ ստեղծելու դարաշրջանում: Իր աշխատություններում Ն. Հովհաննիսյանը լայնողեն անդրադարձել է նաև իսլամագիտությանը վերաբերող հարցերին՝ ուսումնասիրելով դրա հիմնախնդիրները ինչպես պատմական կտրվածքով, այնպես էլ՝ արդիական ուղղությունների տեսանկյունից:

Անվանի արևելագետի ուսումնասիրություններում առանձնահատուկ տեղ է գրավում արաբական երկրների տարբեր դարաշրջանների պատմության համակողմանի հետազոտությունը: Նման աշխատությունների շարքում իր կարևորությամբ առանձնանում է նրա «Արաբական երկրների պատմություն» քառահաստորյակը (հ. 1, Երևան, 2003, հ. 2, Երևան, 2004, հ. 3, Երևան, 2006, հ. 4, Երևան, 2007), որտեղ արաբական տար-

բեր երկրների պատմությունը ներկայացնում է VII դարից մինչև մեր օրերը: Պատահական չէ, որ այդ ծանրակշիռ աշխատությունը մեծ հետաքրքրություն առաջ բերեց գիտական շրջանակներում և առաջին հերթին արաբական երկրներում: 2011 թ. այն թարգմանվել է արաբերեն և Հրատարակվել Հալեպում:

2002 թ. համատեղությամբ աշխատանքի անցնելով ՀՀ պաշտպանության նախարարության Դրույանի անվան ազգային ռազմավարական հետազոտությունների ինստիտուտում՝ Ն. Հովհաննիսյանը կատարել է վերլուծաբանի աշխատանքներ՝ տպագրելով մի շարք հետաքրքիր և ուշագրավ հոդվածներ: Առհասարակ, հարկ է հատուկ շեշտել նրա վաստակը նաև քաղաքական արևելագիտության, ինչպես և՝ միջազգային հարաբերությունների բնագավառում, որոնք լայն արձագանք են դուել ու արժանացել բարձր գնահատականի տարրեր երկրների ճանաչված մասնագետների կողմից:

Ն. Հովհաննիսյանին որպես արևելագետի բնորոշ է գիտական նորարարությունը: Միշտ գտնվելով գիտական որոնումների առաջին գծում՝ նա մշտապես առաջ է քաշել նոր մտքեր ու գաղափարներ, հայեցակարգային բնույթի յուրօրինակ և հետաքրքիր մոտեցումներ, տեսադրույթներ:

Ճանաչված արևելագետի ուսումնասիրություններում միջազգային հարաբերությունների պրոբլեմը իրականացվում է համաշխարհային ընդհանուր գործնականությունների և Մերձավոր Արևելքի իրողությունների ընդհանուր հենքի վրա՝ չսահմանափակվելով լոկ արաբական շրջանակներով, այլ դրանք սերտորեն աղերսելով միմյանց հետ:

Գիտնականն առանձնահատուկ ուշադրություն է դարձրել Մերձավոր ու Միջին Արևելքի, մասնավորապես արաբական երկրների հայերի հարաբերությունների հարցին հյուրընկալ երկրների ժողովուրդների հետ՝ բացահայտելով այն կարևոր դերը, որը հայերը խաղացել են տարածաշրջանի երկրների պետական, քաղաքական, տնտեսական և մշակութային կյանքում:

Ն. Հովհաննիսյանին մեծ ճանաչում բերեցին արաբական ժամանակակից պատմագրության մեջ Հայկական հարցի և Հայոց ցեղասպանության լուսաբանմանը նվիրված աշխատությունները: Միանշանակ կարելի է արձանագրել, որ դրանք զգալիորեն ընդլայնեցին Հայկական հարցի և Հայոց մեծ եղեռնի ուսումնասիրության շրջանակներն ու աղբյուրագիտական հիմքը: Գիտնականը հանրության ուշադրությանը ներկայացրեց այն իրողությունը, որ արաբական պատմագրությունը Հայոց ցեղասպանությունն ընկալում է որպես ոճրագործություն ոչ միայն հայերի, այլև՝ համայն մարդկության դեմ: Միաժամանակ նա լայն շրջանառության մեջ ընդգրկեց նաև «Հայասպանություն» եզրը:

Վերոհիշյալ թեմաներով Ն. Հովհաննիսյանի շարադրած ուսումնասիրությունները արդյունք են տարիների ընթացքում կուտակած փորձի, խորը գիտելիքների և տեսական բարձր պատրաստվածության, ուստի աչքի են ընկնում իրենց տեսակի մեջ եզակի հատկանիշներով: Պատահական չէ, որ դրանք ըստ արժանվույն գնահատվել են ոչ միայն մեզանում, այլև՝ արտասահմանում:

Ն. Հովհաննիսյանը ոչ միայն անվանի գիտնական է, այլև՝ գիտության փայլուն կազմակերպիչ։ Տարիներ շարունակ զբաղեցնելով ՀՀ ԳԱԱ արևելագիտության ինստիտուտի տնօրենի գիտական հարցերի գծով տեղակալի և նույն ինստիտուտի երկարամյա տնօրենի պաշտոնը՝ նա իրեն դրսերել է որպես նախաձեռնող, եռանդուն, կազմակերպչական մեծ ունակություններով օժտված ու գիտական նորարարությանը նվիրյալ ղեկավար։ Նրա անդուլ ջանքերի շնորհիվ դրամաշնորհներ ձեռք բերվեցին արտասահմանյան մի շարք հիմնադրամներից, որոնք Արևելագիտության ինստիտուտին հնարավորություն տվեց հրատարակել բազմաթիվ արժեքավոր մենագրություններ, վերական «Մերձավոր և Միջին Արևելքի երկրներ և ժողովուրդներ» տարիներ շարունակ ընդհատված մատենաշարի հրատարակությունն և այլն։

Հարկ է նշել, որ Հայաստանի անկախացումից հետո ստեղծված նոր իրավությունը պահանջում էր նորովի մոտենալ ու վերակիմաստավորել հայ արևելագիտության խնդիրներն ու ուղղությունները։ Որպես Արևելագիտության ինստիտուտի ղեկավար՝ Ն. Հովհաննիսյանի ծառայություններից մեկն էլ այն է, որ նա կարողացավ մեր նորոգ անկախության առաջին դժվարին տարիներին պահպանել հայ արևելագիտների գենոֆոններ և բարձրացնել հայ արևելագիտական ակադեմիական կենտրոնի միջազգային վարկն ու հեղինակությունը։

Ն. Հովհաննիսյանը պատշաճ մակարդակով է հայ արևելագիտությունը ներկայացրել աշխարհին։ Նա դասախոսություններ է կարդացել ու գիտական գեկուցումներով հանդես եկել արտասահմանյան բազմաթիվ երկրների հեղինակավոր համալսարաններում ու գիտական կենտրոններում, աշխարհի տարբեր քաղաքներում կայացած արևելագիտական միջազգային կոնգրեսներում և համաժողովներում։ Գիտահետազոտական աշխատանքներ է կատարել Դամասկոսի, Հայեալի, Լոնդոնի, Էդինբուրգի, Վաշինգտոնի, Մերիլենդի և այլ համալսարաններում ու գիտական կենտրոններում։

Որպես հայ արևելագիտության ջերմեռանդ ու աննկուն պրոպագանդիստ՝ Ն. Հովհաննիսյանը եռանդ չի խնայել աշխարհին ներկայացնելու հայ արևելագիտական և, առհասարակ, պատմագիտական մտքի ձեռքբերումները։ Նրա այդ անդուլ ջանքերի շնորհիվ ներկայումս հայ արևելագիտությունը, մասնավորապես՝ արաբագիտությունը, ճանաչվել է որպես մեծ ձեռքբերումներ նվաճած գիտական ուղղություն։

Նշանակալի է նաև Ն. Հովհաննիսյանի լուման ու ներդրումն արևելագիտական կազմերի պատրաստման բնագավառում։ Իր ողջ գիտական գործունեության ընթացքում նա մեծ ու Հոգատար վերաբերմունք է ցուցաբերել երիտասարդ շնորհամբ կազմերի նկատմամբ։ Հատ էության, գիտական բարձրակարգ կազմերի պատրաստումը նրա համար եղել է հույժ առաջնային խնդիր։ Արևելագիտության ղեկավարությամբ, գիտական խորհրդատվություններով և աջակցությամբ մոտ 50 ասպիրանտներ, հայցորդներ և գիտաշխատողներ, այդ թվում՝ արտերկրից, պաշտպանել են թեկնածուական ու դոկտորական ատենախոսություններ։

Ն. Հովհաննիսյանը տարիներ շարունակ եղել է ՀՀ ԳԱԱ արևելագիտության ինստիտուտի գիտական խորհրդի, ինստիտուտում գործող Բարձրագույն որակավորման կոմիտեի «Համաշխարհային պատմություն» մասնագիտական խորհրդի նախագահ ու անդամ, մեր հանրապետության տարբեր գիտական կենտրոնների և ուսումնական հաստատությունների գիտական խորհրդների անդամ:

Անվանի գիտնականի գիտական վաստակը լայն ճանաչում է գտել ու բարձր գնահատանքի արժանացել նաև արտասահմանյան տարբեր երկրներում: Նա ընտրվել է արտասահմանյան մի շարք երկրների գիտությունների միջազգային ակադեմիաների, հեղինակավոր միջազգային ընկերությունների ու կազմակերպությունների պատվավոր անդամ: Եղել է կոնֆլիկտների լուծման Հայաստանի կենտրոնի հիմնադիր տնօրեն, Հայատլանտյան ասոցիացիայի համանախագահ և այլն: Քեմբրիջի (Անգլիա) միջազգային կենսագրական կենտրոնը Ն. Հովհաննիսյանին ընտրել է որպես «2004-ի տարվա միջազգային գիտնական»: Խոկ 2005 թ. նրան ճանաչել «XXI դարի ականավոր գիտնական»: Նրա գիտական վաստակը գնահատվել է ըստ արժանավույն պարզևատրվել է Մովսես Խորենացու մեղալով և մի շարք հուշամեղալներով: Արժանացել է նաև ՀՀ նախագահի մրցանակի, զանազան պատվոգրերի ու չնորհակալագրերի:

Ն. Հովհաննիսյանն աչքի է ընկնում նաև ակտիվ հասարակական-քաղաքական գործունեությամբ: Եղել է «Սովետա-արաբական բարեկամության ասոցիացիայի» փոխնախագահ, «ԽՍՀՄ-Իրաք» բարեկամության ընկերության փոխնախագահ, «ԽՍՀՄ-Լիբանան» ու «ԽՍՀՄ-Եմենի Դեմոկրատական ժողովրդական Հանրապետության» բարեկամության ընկերության վարչության անդամ, Հայ-արաբական բարեկամության և մշակութային կապերի ընկերության նախագահ, Ասիայի ու Աֆրիկայի համերաշխության խորհրդային կոմիտեի ու վարչության անդամ, Ասիայի և Աֆրիկայի համերաշխության հայկական կոմիտեի ու վարչության անդամ, Արտասահմանյան երկրների հետ բարեկամության և մշակութային կապերի հայկական ընկերության վարչության ու նախագահության անդամ:

Նշանավոր արևելագետը հաճախ ներգրավվել է պետական մակարդակով զանազան պատվիրակությունների կազմում, որոնք մեկնել են արտասահմանյան տարբեր երկրներ, մասնակցել կարևոր բանակցությունների: Այդ այցելությունների ընթացքում հաճախ լիազորված է եղել կնքել զանազան պայմանագրեր և հուշագրեր:

Որպես անհատականություն՝ Ն. Հովհաննիսյանը լայն մտահորիզոնի, խոր գիտելիքների, բազմակողմանի զարգացած մարդ է, բազմազան հետաքրքրություններ ունեցող և ծրագրեր հետապնդող, արտասովոր աշխատունակ ու եռանդուն: Դյուրահաղորդ է, ուշադիր իր գործընկերների նկատմամբ: Նրան բնորոշ է խստապահանջությունն ու աշխատանքային կարգապահության ողին: Միաժամանակ պատրաստ է համագործակցության, եթե, մանավանդ, խոսքը գնում է գիտական կարևոր որևէ խնդրի կենսագործմանը: Որպես գիտության կազմակերպիչ՝ կարողանում է իր շուրջը համախմբել կարող, հեռանկարային գիտությանն ան-

մնացորդ նվիրված մարդկանց: Խառնվածքով վերին աստիճանի ակտիվ է և նախաձեռնող: Իբրև հետազոտող՝ իր առջև դրված հարցերի լուծմանը մոտենում է լայն հայացքով և ծավալուն ընդգրկումներով:

Չնայած իր առաջացած տարիքին՝ Ն. Հովհաննիսյանն այսօր էլ լի է ավյունով ու անսպաս եռանդով, գալիք աշխատանքային մեծ ծրագրերով: Ուրախալի է նաև, որ, չնայած իր կյանքի ինը տասնյակ գարուններին, նա բնավ չի կորցրել հումորի զգացումը: Ուրեմն մաղթենք հարգարժան գիտնականին քաջառողջություն, մշտանորոգ կորով և ազգանվեր նոր իրագործումներ:

ՎԱՀԱՆ ԲԱՅԲՈՒՐԴՅԱՆ

Պ. Գ. Դ., ՀՀ ԳԱԱ արևելագիտության ինստիտուտի իրանի բաժնի վարիչ, ԵՊՀ-ի միջազգային հարաբերությունների ֆակուլտետի պրոֆեսոր: Գիտական հետաքրքրությունները՝ իրանի և Թուրքիայի պատմություն, հայագիտության հարցեր, Մերձավոր և Միջին Արևելքի երկրների պատմություն, քրդագիտություն, հայ գաղթօջախների պատմություն, միջազգային հարաբերություններ: Հեղինակ է 10 մենագրության և շուրջ 200 հոդվածի: vbayburdyan1933@gmail.com